

葉長老阿難及一切世間天人阿修羅等聞
佛所說歡喜奉行

大乘四法經

離垢慧菩薩所問禮佛法經序

唐終南山沙門釋道宣撰

惟夫慢幢難偃三界由此輪迴愛水未清四
惑因茲流洒自非獨拔開士出有至人何能
裂愛網而闢重關質深疑而啓昏趣有離垢

慧菩薩者道高初住德踰八恒假時俗之津
途發深識之嘉問如來以無緣之勝辯赴有
待之幽情斷五趣之蓋纏藉五輪之禮念所
以五通五眼自此增修五位五生承斯圓滿
蘊結中夏千六百年顏運有蹤載聞東壤洎
龍朔二年有天竺三藏厥號那提統括六異
之宗窮微四圍之典九部八藏詞無昧於自
他十諦一乘義有歸於空色並詳略名理妙
達宏致來儀帝里頻謁天庭降厚禮於慈恩
將歸飛於海表以此經羣聖之發軔凡衆之

初心乃出流布傳於道俗遂依繕寫所在通
之恐未悉其來由故因叙其緣致云爾

離垢慧菩薩所問禮佛法經

唐中天竺三藏法師那提譯

如是我聞一時佛在室羅祇悉帝城勝德林
中給孤獨園與大比丘衆五百人俱菩薩無
央數又與無量婆羅門毗舍首陀并諸長者

各各皆是大衆之首與其同類來至佛所又
有天龍夜叉乾闥婆阿修羅迦樓羅緊那羅
摩睺羅伽在大法會前後圍遶爾時衆中有
菩薩摩訶薩名離垢慧即從座起偏袒右肩
右膝著地恭敬合掌前白佛言世尊欲有少
問願見聽許佛言恣汝所問當隨意答離垢
慧菩薩既聞佛許踊躍無量而白佛言若有
善男子善女人等於如來所云何恭敬禮拜
供養佛言離垢慧善哉善哉汝多悲愍饒益
安樂一切人天當善諦聽為汝解說若善男

子及善女人欲於佛所起禮敬者先應發願作如是言我今至心頂禮十方諸佛普入一切諸勝法中我今五輪於佛作禮爲斷五道離於五蓋願諸衆生常得安住無壞五通具足五眼願我右膝著地之時令諸衆生得正覺道願我左膝著地之時令諸衆生於外道法不起邪見悉得安立正覺道中願我右手著地之時猶如世尊坐金剛座右手指地震動現瑞證大菩提今我亦爾共諸衆生同證覺道願我左手著地之時令諸外道難調伏

者以四攝法而攝取之令入正法願我首頂著地之時令諸衆生離憍慢心悉得成就無見頂相離垢慧是爲五輪作禮之相次禮十方現在諸佛應作是言
南無東方阿閼如來廣及彼方無量世界一切如來諸大法藏并諸菩薩聲聞緣覺一切賢聖 南無南方寶相如來廣及彼方無量世界一切如來諸大法藏并諸菩薩聲聞緣覺一切賢聖 南無西方無量壽如來廣及彼方無量世界一切如來諸大法藏并諸菩

薩聲聞緣覺一切賢聖 南無北方妙鼓聲
如來廣及彼方無量世界一切如來諸大法
藏并諸菩薩聲聞緣覺一切賢聖 南無東
南方因陀羅雞都幢王如來廣及彼方無量
世界一切如來諸大法藏并諸菩薩聲聞緣
覺一切賢聖 南無西南方寶遊步如來廣
及彼方無量世界一切如來諸大法藏并諸
菩薩聲聞緣覺一切賢聖 南無西北方娑
羅因陀羅王如來廣及彼方無量世界一切
如來諸大法藏并諸菩薩聲聞緣覺一切賢

第七

十二

聖 南無東北方無量幢王如來廣及彼方
無量世界一切如來諸大法藏并諸菩薩聲
聞緣覺一切賢聖 南無上方智光如來廣
及彼方無量世界一切如來諸大法藏并諸
菩薩聲聞緣覺一切賢聖 南無下方毗盧
遮那如來廣及彼方無量世界一切如來諸
大法藏并諸菩薩聲聞緣覺一切賢聖 次
又歸命娑訶世界本師釋迦牟尼如來廣及
十方無量世界一切如來諸大法藏及入地
菩薩摩訶薩聲聞緣覺一切賢聖又作是言

我今一心頂禮如上一切佛法諸賢聖衆當
願證知我從今日乃至菩提常行歸依佛世
尊者大慈悲者一切智者一切知見者諸畏
已離者人中大師子大龍王人中八仙士大
丈夫一切徧知不思議身無上身無等身不
與二乘共身清淨法身一切衆中最尊上者
我今至誠一心歸命如是歸命百徧千徧百
千萬徧乃至無量無數徧盡未來際徹骨徹
髓歸依如上諸佛世尊又作是言我今以身
口意三業善根共諸衆生歸依於佛常不離

佛如是歸依坐道場者常住常恒不遷變者
不老不死不滅壞者無住無緣性寂靜者住
於法舍作大護念爲洲渚者爲歸爲依證涅
槃者於諸法中住最上者我今至誠殷勤鄭
重歸命如是諸佛正法重又如上至誠歸命
住種性中諸菩薩等從歡喜地乃至法雲住
於十地諸菩薩僧次應懺悔當作是言惟願
十方諸佛世尊證知憶念哀受我懺身業三
種行殺盜婬口業有四妄言惡口兩舌綺語
意三業行謂貪瞋癡自作教他見作隨喜如

是十惡今悉懺悔又重思惟無始已來輪轉六道於諸衆生種種欺負大斗重秤取物自資輕秤小斗便與他物假飾衣金潛行毒藥皆爲損害今悉懺悔或謗三乘妄說法律輕慢三寶欺調二親於諸尊長和尚闍梨耆老之前不生祇敬如是等過去諸罪今悉懺悔現在惡業誠心發露所未作者更不敢作今於諸佛諸菩薩等最大衆首無比無上無等等前發露懺悔不敢覆藏一懺已後更不重造如是懺悔第二第三亦如上說次應勸請

當作是言十方諸佛若未轉法輪若欲入涅槃者我皆勸請惟願久住於無量劫愍諸衆生雨大法雨轉正法輪不般涅槃次應隨喜當作是言十方所有三乘賢聖數如恒沙及一切衆生修行六度助菩提法我皆隨喜次應迴向當作是言十方三世諸佛作業及諸菩薩聲聞緣覺所行六度盡已迴向無上菩提我亦如是迴向佛道次應發願仰惟十方三世諸佛菩薩皆發弘願盡虛空徧法界所在流化爲諸衆生三界所攝無有遺餘願令

第七

十四

衆生利樂成熟具善律儀住大涅槃今並現
前我亦如是大誓莊嚴願我於無上道心不
散亂常見諸佛常聞正法承事修行無有空
過所作善法及菩提心亦不退失所生之處
供養聖衆教化衆生得無上道轉正法輪具
大神通亦令衆生如是修學至不退轉又願
一切衆生早斷諸苦速證涅槃住如來智我
既出於生死覺悟一切亦令衆生出離生死
解脫煩惱覺悟一切惟願十方諸佛證知我
行菩薩道發興願海爾時世尊而說頌曰

願我所生處	隨業而受形	成大丈夫身
有信諸根具	通技術藝能	廣解諸教意
世事悉棄捨	諸欲皆遠離	正語住法念
莊嚴菩提心	敬事善知識	有情咸見重
威儀既具足	淨念受樂報	常畏彼惡業
遊步於善法	恒依十度行	故得成菩提
乃至最後身	常與衆生樂	珠中摩尼勝
能成利他事	願我窮未來	利益無休息
佛告離垢慧菩薩摩訶薩言若有衆生行菩		
薩道如我所說當依修學說是經已離垢慧		

等及諸大衆天龍夜叉乾闥婆阿修羅迦樓
羅緊那羅摩睺羅伽人非人等聞佛所說歡
喜奉行

離垢慧菩薩所問禮佛法經

音釋

戀龍眷切 驕壹計切 磐蒲官切 警警居
策警居 踰踰切 跨苦化
也策勵也 偃於愜 洒彌充切 跨苦化
也策勵也 止忍切 繕時戰切 阿梵語也 閱云無動也
初六